

**«Հայաստանի պետական տնտեսագիտական համալսարան»
պետական ոչ առևտրային կազմակերպության գիտական խորհուրդ**

**Ո Ր Ո Շ ՈՒ Մ N 1
07 փետրվարի 2014 թվականի**

**Համալսարանի 2013 թվականի գիտահետազոտական գործունեության
արդյունքների և 2014 թվականի խնդիրների մասին**

Լսելով և քննարկելով «Համալսարանի 2013 թվականի գիտահետազոտական գործունեության արդյունքների և 2014 թվականի խնդիրների մասին» հարցը (զեկուցող՝ գիտության և արտաքին կապերի գծով պրոռեկտոր, տնտեսագիտության դոկտոր, պրոֆեսոր Գ.Ի.Վարդանյան)՝ գիտական խորհուրդն արձանագրում է՝ 2013 թվականի գիտահետազոտական աշխատանքի պլանավորված ծավալը, ընդհանուր առմամբ, կատարված է, առաջադրված խնդիրները լուծված են:

Հաշվետու ժամանակաշրջանում ՀՊՏՀ-ում շարունակվել է ամբիոնային 54 թեմաներով գիտահետազոտական աշխատանքների իրականացումը, ավարտին են հասցվել ՀՀ ԿԳՆ գիտության պետական կոմիտեի 3 դրամաշնորհային, 13 ներհամալսարանական գիտական դրամաշնորհային թեմաներ, սկսվել է «Ամբերդ» հետազոտական կենտրոնի գործունեությունը. երեք ծրագրերի շրջանակներում իրականացվել են հետազոտություններ 15 գիտական ուղղություններով:

Կենտրոնում իրականացվող հետազոտություններում 2013 թ. ընդգրկված է եղել մոտ 90 հետազոտող՝ դասախոսներ, ասպիրանտներ, մագիստրանտներ, պետական կառավարման մարմինների աշխատակիցներ, մասնավոր հատվածի փորձառու մասնագետներ:

Ներհամալսարանական դրամաշնորհային թեմաներին մասնակցել է 70 հետազոտող՝ դասախոսներ, ասպիրանտներ և ուսանողներ:

Ընդհանուր առմամբ, ներհամալսարանական դրամաշնորհային թեմաներում և «Ամբերդ» հետազոտական կենտրոնի գիտահետազոտական ուղղություններում ներգրավված է եղել բուհի պրոֆեսորադասախոսական կազմի շուրջ 20%-ը:

2013 թվականին իրականացված հետազոտությունների արդյունքների հիման վրա հրատարակվել են 1 դասագիրք, 14 ուսումնական ձեռնարկ, 4 մենագրություն, 7 գիրք, 9 դասախոսության տեքստ, 550 գիտական հոդված, 39 ուսումնամեթոդական աշխատանք, 1 բառարան: Հոդվածներից 62-ը լույս է տեսել արտասահմանյան պարբերականներում:

Հետազոտական աշխատանքի արդյունքում պաշտպանվել են 34 թեկնածուական և 1 դոկտորական ատենախոսություններ:

Գիտական ամսագրերում 2013 թ., 2011 թ. համեմատությամբ, 1,5 անգամ ավելացել է ՀՊՏՀ աշխատակիցների, ասպիրանտների ու մագիստրանտների հրապարակումների թիվը: Միևնույն ժամանակ, 1,7 անգամ ավելացել է հրապարակումների քանակն արտասահմանյան ամսագրերում: Դրանց 53,5%-ը բաժին է ընկնում 7 ամբիոնի (մակրոէկոնոմիկայի՝ 13%, միկրոէկոնոմիկայի և

ծեռնարկատիրական գործունեության կազմակերպման՝ 9%, բանկային գործի և ապահովագրության՝ 7,2%, մարքեթինգի՝ 6,7%, միջազգային տնտեսական հարաբերությունների՝ 6,2%, ֆինանսների՝ 5,8%, կառավարման՝ 5,6%, բնօգտագործման տնտեսագիտության՝ 5,4%):

2013 թ. հուլիսի 6-8-ը Աղվերանում տեղի ունեցած «Զարգացում» ներհամալսարանական գիտաժողովը համանման միջոցառումների շարքում նորարարություն էր: Նպատակն էր «Ամբերդ» հետազոտական կենտրոնի ուսումնասիրությունների, ներհամալսարանական գիտական դրամաշնորհների և ՀՀ ԿԳՆ գիտության պետական կոմիտեի բյուջետային ֆինանսավորմամբ թեմաների շրջանակներում հայեցակարգային մոտեցումների, կատարված հետազոտությունների նախնական արդյունքների ներկայացումը:

ՀՀ ԿԳՆ գիտության պետական կոմիտեի ֆինանսական աջակցությամբ 2013 թ. հոկտեմբերի 23-25-ը անցկացվեց համալսարանի 23-րդ գիտական նստաշրջանը՝ «Տնտեսական զարգացման քաղաքականության արդի հիմնախնդիրները ՀՀ-ում» խորագրով: Լիագումար նիստին «ՀՀ գիտության ոլորտի զարգացման միտումները և խնդիրները» զեկուցումով հանդես եկավ ՀՀ ԿԳՆ գիտության պետական կոմիտեի նախագահ, ֆիզիկամաթեմատիկական գիտությունների դոկտոր, պրոֆեսոր Սամվել Հարությունյանը:

Գիտաժողովի աշխատանքները կազմակերպվեցին «Գործարար միջավայր և ներդրումային քաղաքականություն» «Ֆինանսական շուկաներ և հարկային քաղաքականություն», «ՀՀ տնտեսական զարգացումը և տնտեսական անվտանգությունը. խնդիրներ և հեռանկարներ», «Միջազգային տնտեսական համագործակցություն» խորագրերով՝ համապատասխան բաժանմունքներում, ներկայացվեց 140-ից ավելի զեկուցում:

Հաշվետու ժամանակաշրջանում կազմակերպվել և անցկացվել են 30-ից ավելի գիտական սեմինարներ ու քննարկումներ՝ նվիրված երկրի ֆինանսական կայունության, սոցիալ-տնտեսական և այլ հրատապ հիմնախնդիրների:

Շարունակվել է հետազոտական համագործակցությունը ՀՀ կենտրոնական բանկի հետ: Համալսարանի ուսանողների և պրոֆեսորադասխոսական կազմի քննարկմանն են ներկայացվել «ՀՀ տնտեսության փաստացի զարգացումները և մակրոտնտեսական կանխատեսումները միջնաժամկետ հատվածում» (2013 թ. ապրիլ 10) և «ՀՀ ֆինանսական կայունության հաշվետվությունը» (2013 թ. նոյեմբեր 27) վերտառությամբ զեկուցումները, ինչպես նաև ՀՀ կենտրոնական բանկի վերլուծությունների ու հետազոտությունների մասին լայնածավալ տեղեկատվություն:

Համալսարանի աշխատակիցները 2013 թվականին մասնակցել են Գերմանիայում, Մալայզիայում, Թաիլանդում, Հունգարիայում, Չինաստանում, Ռուսաստանի Դաշնությունում, Ուկրաինայում, Վրաստանում անցկացված գիտաժողովներին:

Նույն ժամանակահատվածում 450 ուսանող ներգրավվել է գիտական աշխատանքում՝ մասնակցելով համալսարանական, հանրապետական և միջազգային գիտաժողովների, սեմինարների, մրցույթների, ներկայացնելով 170-ից ավելի զեկուցում:

Ապրիլի 26-28-ը ՀՊՏՀ ուսանողական խորհրդի և Հայաստանի երիտասարդական հիմնադրամի նախաձեռնությամբ կազմակերպված «ՀՀ տնտեսության

զարգացման մարտահրավերներն ու խոչընդոտները» և մայիսի 31-ից հունիսի 2-ը ՈՒԳԸ «ՀՀ տնտեսության զարգացման հիմնախնդիրները» խորագրերով երկու ուսանողական գիտաժողովներ են տեղի ունեցել Ծաղկաձորում:

Համալսարանում շարունակվում են ուսանողներին գիտական աշխատանքում ներգրավելու ուղղությամբ կատարվող քայլերը: 2013 թվականն առանձնանում է նաև նրանով, որ առաջին անգամ, ֆինանսական հիմունքներով, ուսանողներ մասնակցեցին ներհամալսարանական դրամաշնորհային և «Ամբերդ» հետազոտական կենտրոնի հետազոտություններին:

Թեպետ հաշվետու տարում գիտահետազոտական գործունեության բնագավառում արձանագրված ձեռքբերումներին, դեռևս առկա են մի շարք հիմնախնդիրներ, որոնցից են.

- երկրի սոցիալ-տնտեսական զարգացման ծրագրերի մշակման գործընթացներին համալսարանի ներուժի ոչ համարժեք մասնակցությունը,
- տնտեսության մասնավոր հատվածի հետ համագործակցության և գիտական հետազոտությունների արդյունքների առևտրայնացման բացակայությունը,
- ֆինանսական հիմունքներով հետազոտություններում ասպիրանտների և ուսանողների ոչ բավարար ներգրավումը,
- տնտեսագիտական մտքի նվաճումների հիման վրա ստեղծված մենագրությունների, դասագրքերի և ուսումնական ձեռնարկների սակավաթիվ լինելը,
- արտասահմանյան առաջատար պարբերականներում գիտական հրապարակումների փոքրաթիվ լինելը,
- իմպակտ-գործոնով միջազգային ամսագրերում հրապարակումների գրեթե բացակայությունը,
- հեղինակավոր միջազգային համաժողովներին համալսարանի գիտնականների, ասպիրանտների և ուսանողների մասնակցության ցածր մակարդակը,
- գիտական համագործակցության շրջանակներում տեղական և արտասահմանյան առաջատար գիտնականների հետ ստեղծագործական թույլ կապերը,
- արտասահմանի առաջատար գիտական կենտրոններում ստաժավորման հազվադեպ լինելը,
- ըստ ամբիոնների՝ գիտական հրապարակումների անհամաչափ բաշխվածությունը,
- գիտաժողովներին, գիտական սեմինարներին և այլ քննարկումներին ամբիոնների պրոֆեսորադասախոսական կազմի մասնակցության ոչ բավարար մակարդակը,
- հետազոտությունների ֆինանսավորման աղբյուրների բազմազանեցված չլինելը:

Ելնելով վերոնշյալից՝ գիտական խորհուրդը

ՈՐՈՇՈՒՄ Է.

1. Հավանություն տալ ՀՊՏՀ գիտության և արտաքին կապերի գծով պրոռեկտոր Գ.Վարդանյանի հաշվետվությանը և բուհում 2013 թվականի գիտահետազոտական գործունեությունը գնահատել բավարար:

2. 2014 թ. որպես ռազմավարական նպատակ սահմանել գիտական հետազոտությունների որակի բարձրացման խնդիրը՝ հիմք ընդունելով.

- մասնավոր հատվածի հետ տևական համագործակցության պայմանագրերով հետազոտությունների իրականացումը,
- բարձր իմպակտ-գործոնով միջազգային ամսագրերում հրապարակումների պատրաստումը,
- հեղինակավոր համաժողովներին համալսարանի գիտնականների, ասպիրանտների և ուսանողների մասնակցությունը,
- գիտական համագործակցության շրջանակներում տեղական և արտասահմանյան առաջատար գիտնականների հետ ստեղծագործական կապերի հաստատումը,
- արտասահմանի առաջատար գիտական կենտրոններում ստաժավորման համակարգի զարգացումը:

3. Ռեկտորատին՝

- քննարկել «պրոֆեսոր-հետազոտող» («դոցենտ-հետազոտող») կատեգորիայի ներմուծման հնարավորությունը, ինչը ենթադրում է պրոֆեսորի (դոցենտի) ուսումնական բեռնվաճառության կրճատում՝ գիտական աշխատանքի միաժամանակյա մեծացմամբ,
- քննարկել ՈՒԳԸ ստորաբաժանումների գիտական ղեկավարների նյութական խրախուսման և ուսումնական բեռնվաճառության մեջ այդ գործառույթը ներառելու հնարավորությունը:

4. Ամբիոններին, ֆակուլտետներին, «Ամբերդ» հետազոտական կենտրոնին՝

- ապահովել ֆինանսական հիմունքներով գիտական հետազոտություններում դասախոսների, ասպիրանտների և ուսանողների ներգրավվածության բարձր աստիճան,
- հետազոտական ուղղություններ և թեմաներ որոշելիս ապահովել դրանց համապատասխանությունը գիտության զարգացման գերակա ուղղություններին և երկրի սոցիալ-տնտեսական հիմնախնդիրներին,
- ապահովել գիտական հետազոտությունների գործնական ուղղվածությունը և դրանց արդյունքների ներդրումը պետական և մասնավոր հատվածներում, համալսարանի կրթական գործընթացներում և ուսումնամեթոդական նյութերում,
- ապահովել գիտական հետազոտությունների արդյունքների պատշաճ հրապարակումը,
- ապահովել Վեբ օֆ Սայնսի (Web of Science), Գուգլ Սքոլարի (Google Scholar) և Սկոպուսի (SCOPUS) գիտական հրատարակչություններում համալսարանի պրոֆեսորադասախոսական կազմի գիտական աշխատանքների հրատարակումը (յուրաքանչյուր ամբիոնի հիմնական հաստիքային 5 աշխատողի հաշվով՝ առնվազն 1 հրատարակում),
- նպաստել միջազգային համաժողովներին համալսարանի դասախոսների, գիտաշխատողների, ասպիրանտների և ուսանողների մասնակցությանը:

5. **ՈՒԳԸ նախագահ Վ.Գ.Գևորգյանին՝** բարձրացնել ՈՒԳԸ աշխատանքներին ուսանողների մասնակցության աստիճանը, լավագույններին երաշխավորել՝ ֆինանսական հիմունքներով հետազոտություններում ընդգրկելու համար:
6. **Ամբիոններին, ֆակուլտետներին՝** համակողմանիորեն աջակցել կրթական բոլոր մակարդակներում և ձևերում ուսանողների մասնակցությանը գիտական հետազոտություններին, ապահովել ուսանողական գիտական ընկերության ստորաբաժանումների գիտական ղեկավարների աշխատանքի արդյունավետությունը:
7. Գիտության և արտաքին կապերի գծով պրոռեկտոր **Գ.Ի.Վարդանյանին** և «Ամբերդ» հետազոտական կենտրոնի տնօրեն **Ս.Ս.Ավետիսյանին՝**
 - մինչև 01.03.2014 թ. ներկայացնել «Ամբերդ» հետազոտական կենտրոնի գիտական հետազոտությունների ուղղությունների ցանկը,
 - մինչև 01.03.2014 թ. ներկայացնել առաջարկություն, ըստ գիտական հետազոտությունների ուղղությունների, 2014 թ. բյուջեով գիտության համար նախատեսված միջոցների բաշխման վերաբերյալ,
 - ներկայացնել առաջարկություն ուղղությունների գիտական ղեկավարներ նշանակելու և հետազոտական խմբերում ընդգրկվող դասախոսների, ասպիրանտների և ուսանողների մասին, 2014 թ. մարտին ազդարարել հետազոտությունների մեկնարկն ըստ ուղղությունների,
 - ապահովել 2013 թ. կատարված հետազոտությունների արդյունքների հրապարակումը մինչև 2014 թ. ապրիլի 30-ը,
 - զարգացնել համագործակցությունը պետական և մասնավոր հատվածների հետ,
 - ստեղծել տվյալների և աշխարհի առաջավոր հետազոտական կենտրոնների ուսումնասիրությունների արդյունքների շտեմարաններ՝ ՀՊՏՀ հետազոտողներին տեղեկատվական աջակցության նպատակով,
 - ապահովել կենտրոնի հետազոտությունների արդյունքների հրապարակումների տարածումը շահառուների շրջանում:
8. Գիտության բաժնի պետ **Խ.Ա.Մխիթարյանին՝**
 - մինչև 2014 թ. մարտի 31-ը ներկայացնել Հայաստանի պետական տնտեսագիտական համալսարանի 2012-2017 թթ. գիտահետազոտական և նորաստեղծական գործունեության զարգացման հայեցակարգի կատարումն ապահովող միջոցառումների ցանկը,
 - ձեռնարկել միջոցառումներ պետական բյուջեից ֆինանսավորման և արտասահմանյան դրամաշնորհների ստացման ուղղությամբ,
 - մշակել և ներկայացնել առաջարկություն ֆինանսական հիմունքներով հետազոտություններ կատարելու նպատակով գիտաուսումնական խմբեր ձևավորելու մասին,

- գիտության և արտաքին կապերի գծով պրոռեկտորին ներկայացնել առաջարկություն խմբերի ղեկավարների և խմբերում ընդգրկվող ասպիրանտների ու մագիստրանտների առնչությամբ,
- մշակել և գիտական խորհրդի քննարկմանը ներկայացնել պրոֆեսորադասախոսական կազմի հեղինակած դասագրքերը, ուսումնական ձեռնարկները և մենագրությունները համալսարանի միջոցներով տպագրելու կարգը:

9. Գիտահետազոտական գործունեության ուղղությամբ ձեռք բերված դրական արդյունքների ամրապնդման և առկա թերությունների վերացման, բնագավառի հետագա զարգացման, համալսարանի գիտական ներուժի մեծացման նպատակով 2014 թ. հունիսին գիտական խորհրդի նիստում քննարկել «Բարձր որակավորմամբ կադրերի պատրաստման ուղղությամբ ամբիոնների աշխատանքի արդյունավետությունը» հարցը (պատասխանատու՝ **Գ.Ի.Վարդանյան**):

10. Սույն որոշման կատարման նկատմամբ վերահսկողությունը վերապահել գիտության և արտաքին կապերի գծով պրոռեկտոր **Գ.Ի.Վարդանյանին**:



Գիտական խորհրդի նախագահ **ՓՈՐՁ • ՀՆԱԲՐԱՎՈՐՈՒԹՅՈՒՆ** **Կ. Լ. Աթոյան**

07.02.2014 թ.

ք. Երևան

**«Հայաստանի պետական տնտեսագիտական համալսարան»
պետական ոչ առևտրային կազմակերպության գիտական խորհուրդ**

**Ո Ր Ո Շ ՈՒ Մ N 2
7 փետրվարի 2014 թվականի**

Ուսումնական բեռնվածության ժամերի բաշխման վերաբերյալ

Լսելով և քննարկելով «Ուսումնական բեռնվածության ժամերի բաշխման վերաբերյալ» հարցը (զեկուցող՝ ուսումնամեթոդական աշխատանքների գծով պրոռեկտոր, տնտեսագիտության թեկնածու, դոցենտ Պ.Ա.Քալանթարյան)՝ գիտական խորհուրդը

ՈՐՈՇՈՒՄ Է.

1. Ուսումնական տարվա հաստիքային բեռնվածության բաշխումն ավարտել օգոստոսի վերջին.

ա) հեռակա ուսուցման ընդունելության արդյունքով ձևավորված (հաշվարկված) կուրսերի ուսումնական բեռնվածությունը բաշխել ժամավճարով,

բ) ուսումնական տարվա ընթացքում, ս հիմնական բեռնվածությունը բաշխելուց հետո, նոր հոսքերի կամ խմբերի ձևավորման հետևանքով առաջացող ժամերը բաշխել ժամավճարով:

2. Սույն որոշման կատարման նկատմամբ վերահսկողությունը վերապահել ուսումնամեթոդական աշխատանքների գծով պրոռեկտոր Պ.Ա.Քալանթարյանին:

3. Սույն որոշումն ուժի մեջ է մտնում ընդունման պահից:

Գիտական խորհրդի նախագահ

Կ. Լ. Աթոյան

07.02.2014 թ.

ք. Երևան



**«Հայաստանի պետական տնտեսագիտական համալսարան»
պետական ոչ առևտրային կազմակերպության գիտական խորհուրդ
Ո Ր Ո Շ ՈՒ Մ N 3**

07 փետրվարի 2014 թվականի

**Հայաստանի պետական տնտեսագիտական համալսարանի
գիտական խորհրդի 2012 թվականի մայիսի 31-ի N 11 նիստի որոշմամբ հաստատված
«Ներհամալսարանական գիտական դրամաշնորհների տրամադրման կարգում»
փոփոխություններ և լրացումներ կատարելու մասին**

Լսելով և քննարկելով «Հայաստանի պետական տնտեսագիտական համալսարանի
գիտական խորհրդի 2012 թվականի մայիսի 31-ի N 11 նիստի որոշմամբ հաստատված
«Ներհամալսարանական գիտական դրամաշնորհների տրամադրման կարգում»
փոփոխություններ և լրացումներ կատարելու մասին» հարցը (զեկուցող՝ գիտության և
արտաքին կապերի գծով պրոռեկտոր, տնտեսագիտության դոկտոր, պրոֆեսոր
Գ.Ի.Վարդանյան)՝ գիտական խորհուրդը

ՈՐՈՇՈՒՄ Է.

**1. «Հայաստանի պետական տնտեսագիտական համալսարանի գիտական խորհրդի
2012 թվականի մայիսի 31-ի N 11 նիստի որոշմամբ հաստատված «Ներհամալ-
սարանական գիտական դրամաշնորհների տրամադրման կարգում» կատարել
հետևյալ փոփոխությունները և լրացումները.**

- 1) կարգի 2-րդ բաժնի՝
 - ա. 2.3-րդ կետում «ուղղությունների» բառը փոխարինել «հայտերի» բառով,
 - բ. 2.3-րդ կետը «ե» ենթակետից հետո լրացնել հետևյալ բովանդակությամբ՝ «զ» ենթակետով.
«զ» գիտահետազոտական նախագծի¹ կատարման համար գիտաուսումնական խումբ² ստեղծելու հայտ:»,
 - գ. «զ» ենթակետը լրացնել հետևյալ բովանդակությամբ նոր հղումներով.
«¹ Գիտահետազոտական նախագիծը մեկ կամ մի քանի ուղղությունների շրջանակներում գիտական և ուսումնական բնույթի հետազոտական աշխատանքի համալիր է՝ կրթական գործընթացում հետագա ներդրման նպատակով:
² Գիտաուսումնական խումբը ուսանողներից, ասպիրանտներից, երիտասարդ դասախոսներից կամ գիտաշխատողներից կազմված կատարողների կոլեկտիվ է, որը ղեկավարում է գիտությունների դոկտորի կամ գիտությունների թեկնածուի գիտական աստիճան ունեցող դասախոսը կամ գիտաշխատողը (համալսարանի հիմնական հաստիքային աշխատող): Առանձին դեպքերում գիտաուսումնական խումբը կարող է ստեղծվել ռեկտորի հրամանով՝ առանց մրցույթ հայտարարելու:»,
- 2) կարգի N 5 հավելվածի 1.2-րդ կետում «մրցութային հանձնաժողովը» բառերը փոխարինել «գիտության բաժինը» բառերով:

**2. Սույն որոշման կատարման նկատմամբ վերահսկողությունը վերապահել
գիտության և արտաքին կապերի գծով պրոռեկտոր Գ.Ի.Վարդանյանին:**

3. Սույն որոշումն ուժի մեջ է մտնում ընդունման պահից:

Գիտական խորհրդի նախագահ

Կ. Լ. Աթոյան

07.02.2014 թ.

ք. Երևան

Ք Ա Ղ Վ Ա Ծ Ք

**«Հայաստանի պետական տնտեսագիտական համալսարան»
պետական ոչ առևտրային կազմակերպության գիտական խորհրդի՝
2014 թվականի փետրվարի 7-ի նիստի N 4 արձանագրությունից**

ԼՍԵՑԻՆ.- «Բանկային գործ» մասնագիտացման բակալավրիատի ամփոփիչ ատեստավորման քննությունների առարկայական ցանկը հաստատելու մասին հարցը:

Զեկուցող՝ ուսումնամեթոդական աշխատանքների գծով պրոռեկտոր, տնտեսագիտության թեկնածու, դոցենտ
Պ.Ա.Քալանթարյան:

ԱՐՏԱՀԱՅՏՎԵՑԻՆ.- Պրոֆեսորներ Կ.Լ.Աթոյանը, Լ.Հ.Բադանյանը, Ա.Լ.Ասլանյանը, Ա.Բ.Սալնազարյանը, Մ.Ն.Հարությունյանը, Ա.Ա.Թավադյանը, դոցենտ Լ.Ն.Մեհրաբյանը:

ՈՐՈՇԵՑԻՆ.- Հաստատել «Բանկային գործ» մասնագիտացման բակալավրիատի ամփոփիչ ատեստավորման քննությունների առարկայական ցանկը՝ համաձայն աղյուսակի.

Մասնագիտացում	Ամփոփիչ ատեստավորման քննությունների առարկայական ցանկը	
	Պարտադիր	Ավարտական աշխատանք չգրող ուսանողների համար
Բանկային գործ	Բանկային գործ	Բանկային ռիսկերի կառավարում

Գիտական խորհրդի նախագահ

Կ. Լ. Աթոյան

Գիտական խորհրդի քարտուղար

Ն. Հ. Դարբինյան

07.02.2014 թ.

ք. Երևան